

# **STRANKA PENZIONERA-UMIROVLJENIKA BOSNE I HERCEGOVINE**

## **P R O G R A M STRANKE PENZIONERA-UMIROVLJENIKA BOSNE I HERCEGOVINE**

### **I - OPĆA OPREDJELJENJA**

1. Stranka penzionera-umirovljenika Bosne i Hercegovine, u narednom mandatnom periodu, će se zalagati da se prestane sa iseljavanjem, naročito mladih ljudi iz naše zemlje i da se vrate oni koji su se iselili. Stranka će se boriti da se svim građanima stvore uslovi, pruži šansa i omogući da iskoriste svoje znanje i sposobnosti koje imaju, da kulturne i druge razlike budu prednosti, a ne uzrok sukoba i netolerancije.
2. Stranka će se zalagati za jeftiniju, stručniju, pošteniju, efikasniju i što je manje moguće birokratsku vlast i da imamo vladu koja će raditi u interesu svih njenih građana na poboljšanju životnog standarda.
3. Promjenama u političkom i društvenom sistemu i zbog ratnih prilika, penzioneri u BiH su dovedeni u izuzetno tešku materijalnu situaciju. Praktično, razbijen je sistem penziono-invalidskog osiguranja. Posebno u ratu, penzioneri su ostali bez svog fonda, a time, skoro u potpunosti, i bez penzija. Imovina fonda (stanovi, hoteli, domovi, odmarališta, poslovni prostori, banjska lječilišta i druga imovina penzionera), čija je ukupna vrijednost prije 1991.godine bila veoma velika, sada je dosta uništena i otuđena. Stranka će tražiti da se sva imovina dovede u upotrebnu funkciju i vrati penzionerima na upotrebu.
4. Odmah poslije završetka rata, tadašnja, kao i ova aktuelna vlast, nisu imale sluha, dobre volje ni razumijevanja da se u pravnom smislu uredi i uspostavi normalan penzioni sistem u Federaciji, kao i u okviru Bosne i Hercegovine.
5. Podjelom certifikata, kao obeštećenja penzionerima koji nisu imali društvene stanove, oni su oštećeni, jer s tim praktično bezvrijednim papirima, nisu mogli kupiti ništa. Aktuelna vlada još nije donijela program mjera o konsolidaciji penziono-invalidskog osiguranja u Federaciji Bosne i Hercegovine. Vlada još nije dala u parlamentarnu proceduru izmjene i dopune Zakona o penzijsko-invalidskom osiguranju, posebno se misli na član 51. ovog Zakona. Penzioneri u Federaciji tek sada primaju 41% od prosječnih plaća radnika, iako im pripada po zakonu 75% prosječnih plaća zaposlenih radnika u Federaciji. Razumije se da takav odnos prema penzionerima je, prije svega, nehuman, nekorektan i nedopustiv i Stranka penzionera-umirovljenika će se boriti protiv svake diskriminacije. Pored istaknutog, najugroženijim kategorijama penzionera su ukinuti invalidski dodaci, dodaci za kućnu njegu (invalidskih, slijepih, gluhoonijemih i hendikepiranih lica).
6. Do 1997.g. penzioneri su se organizovali i svoje aktivnosti, za ostvarenje zakonski stečenih i neotuđivih prava, razvijali u okvirima, oblicima organizovanja i metodama

djelovanja Saveza udruženja penzionera. Kada je postalo svima jasno i očito da se njihov status, kako ekonomski, tako i društveni, iz godine u godinu pogoršava i postaje nepodnošljiv, a da aktuelne vlasti ne žele, niti hoće, da bilo šta učine na poboljšanju tog položaja, a da Savez udruženja penzionera nije u mogućnosti da iznalazi adekvatna rješenja. Zbog svog statusa i zbog izvjesnih subjektivnih razloga, penzioneri su se odlučili da se politički organizuju, kako bi u okviru zakonodavnih i izvršnih organa vlasti, uspješnije ostvarivali svoja stečena prava.

7. Naime, pokazalo se nužnim da se stvore uslovi i oblici političkog organizovanja i djelovanja, a posebno stvaranje mogućnosti za organizovano i povećano uključivanje predstavnika penzionerske populacije u strukture u kojima se odlučuje o ekonomskom, materijalnom položaju i društvenom statusu penzionera (u zakonodavnim, izvršnim i drugim organima vlasti). Na tim osnovama i opredjeljenjima došlo je još početkom 2000. godine do inicijative za ujedinjenje političkih stranaka penzionera. Sve okolnosti u društvu, a posebno opredjeljenje svih penzionera ukazuju na to da su se tada stekli svi neophodni uslovi za ujedinjenje dviju političkih stranaka penzionera, odnosno za organizovanje penzionera u jedinstvenu Stranku penzionera-umirovljenika Bosne i Hercegovine.
8. Odmah poslije ujedinjenja Stranka je vrlo brzo brojno ojačala, došlo je do naglog širenja i materijalnog i kadrovskog jačanja Stranke i do povećanja mjesnih, općinskih i kantonalnih organizacija na području cijele Federacije BiH. Formirane su 32 općinske organizacije i 4 kantonalne organizacije. Prema najnovijoj evidenciji, Stranka sada broji preko 42.000 svojih članova, a jedan dobar broj redovno plaća članarinu. Potrebno je nastaviti još intenzivniju aktivnost na planu brojnog i kadrovskog jačanja i širenja Stranke na cijelom prostoru Federacije BiH, pa i BiH.

## **II POLITIČKI CILJEVI STRANKE**

Političke ciljeve i programska opredjeljenja Stranka će ostvarivati na osnovama i u oblicima organizovanja utvrđenim Statutom Stranke i potrebama koje proisteknu iz sporazuma koje Stranka postigne sa drugim političkim strankama, organima, organizacijama i asocijacijama, djelujući i organizujući se kao demokratska, multietnička i jedinstvena politička organizacija penzionera Bosne i Hercegovine, kao i svih građana Bosne i Hercegovine, koji su saglasni sa ovim programom.

U svom političkom djelovanju Stranka će primjenjivati one metode, sredstva i oblike aktivnosti kojima se obezbjeđuje optimalna realizacija funkcija i uloge Stranke na principima demokratičnosti, tolerancije i konstruktivne saradnje sa odgovarajućim političkim subjektima u okviru Ustava i zakona Bosne i Hercegovine.

Na iznesenim osnovama i principima, Stranka i njeni organi, na svim nivoima organizovanja, će se kontinuirano i u punoj mjeri posebno zalagati i boriti za realizaciju sljedećih opredjeljenja i zadataka:

- Stranka penzionera-umirovljenika BiH je čvrsto opredjeljena za suverenu, cjelovitu i politički nezavisnu BiH, decentraliziranu državu multietničkih regija i lokalne samouprave prema evropskim standardima;
- Koncept vlasti ustanovljen Aneksom 4 Dejtonskog sporazuma sve više postaje kočnica daljeg razvoja i pune integracije Bosne i Hercegovine. S toga će se Stranka zalagati za

ustavnu integraciju kroz izmjene postojećeg koncepta, tj. Ustava i za usklađivanje niza postojećih diskriminatorskih zakona, počev od Zakona o službenim jezicima, obrazovanju, do Zakona o praznicima i državnim obilježjima itd.

- U pogledu buduće organizacije vlasti entiteta, shodno evropskim standardima o lokalnoj samoupravi, Stranka će se zalagati za formiranje regija i proširenje nadležnosti općina, a sve sa ciljem da se izgradi funkcionalnija, efikasnija i jeftinija vlast, koja će više odgovarati potrebama države i građana.
- U prvom redu, potrebno je Ustav BiH uskladiti sa evropskim konvencijama o ljudskim pravima, s ciljem da institucije države preuzmu ustavom propisane nadležnosti, kao i da entiteti dio nadležnosti prenesu na državu. Zalagat ćemo se za buduću državu sa jakom centralnom vladom, koja će biti nadležna i za poslove odbrane, sigurnosti i zajedničke ekonomske politike, uključujući rad i zapošljavanje, kao i jedinstveni penziono-invalidski sistem na nivou države BiH. Zato smo za jačanje pravne države i za snažno građansko demokratsko društvo, u kojem je čovjek-pojedinac subjekt društvenih procesa, a pravna država u funkciji općeg dobra.
- Izgradnja i razvijanje povjerenja među ljudima jedan je od bitnih uvjeta za trajni mir u BiH. Za ovo je neophodno utvrđivanje istine o proteklom ratu, u čemu nezamjenjivu ulogu imaju Međunarodni sud za ratne zločine u Hagu. U tom smislu podržavamo punu saradnju sa Haškim tribunalom i formiranje njemu sličnog Suda na nivou BiH za suđenje ratnim zločincima.
- Stranka će se zalagati da niko nije i da ne može biti iznad zakona. Bosna i Hercegovina mora imati zaokružen pravni sistem, tako da svi građani, bez obzira gdje žive, imaju ista prava i zaštitu. Bosna i Hercegovina, kao članica Vijeća Evrope, mora donijeti nove, ili postojeće zakone uskladiti sa međunarodnim konvencijama.
- Da su vladavina prava, ustavnost i zakonitost osnovna mjerila legaliteta i odgovornosti državnih organa.
- Da se konkretno i efikasno provodi Dejtonski mirovni sporazum, te da se mijenja u skladu sa novonastalim potrebama.
- Da se dosljedno provodi Odluka Ustavnog suda Bosne i Hercegovine o konstitutivnosti naroda na teritoriji cijele Bosne i Hercegovine.
- Da se dograde i ojačaju zajedničke državne institucije, posebno institucije koje štite ljudska prava i slobode, ustavnost i zakonitost, zaštita granica i sloboda kretanja roba, lica, usluga i kapitala u cijeloj Bosni i Hercegovini.
- Da se obezbijedi hapšenje i suđenje svim osumnjičenim za ratne zločine.
- Da se bezuvjetno radi na povratku izbjeglih, prognanih i raseljenih građana Bosne i Hercegovine u svoje predratne domove i ostvaruje implementacija imovinskih zakona i njihovo usklađivanje između entiteta.
- Da se obezbijedi održivi povratak, usmjeravanje odgovarajućih sredstava i aktivnosti, veće zapošljavanje povratnika, organizovanje obrazovnog procesa, osnovna socijalna zaštita i sigurnost, jer je povratak izbjeglica uvjet uspostave i jačanja povjerenja, pomirenja i zajedničkog života naroda Bosne i Hercegovine.

### III EKONOMSKA POLITIKA

Stranka će se zalagati za provođenje ekonomskih i drugih reformi, kako bi se obezbjedio veći priliv inostranog kapitala i brže otvaranje novih radnih mjesta, zbog čega je potrebno posebnu pažnju pokloniti sljedećim aktivnostima:

- Da se ekonomska politika u narednom periodu temelji na uspostavljanju jedinstvenog ekonomskog prostora u BiH, uključujući rad i zapošljavanje, kao i prilagođavanje i integraciju u sistem sa Evropskom unijom.
- Okončanju procesa privatizacije do kraja 2006.godine, izuzev onih firmi koje treba da ostanu u većinskom vlasništvu države.
- Uvođenje stečaja kao metoda privatizacije i ozdravljenje preduzeća.
- Uravnoteženje platnog bilansa i jačanju konkurentne sposobnosti domaćih subjekata kroz sistem podrške izvozu. Ujedinjenje elektroenergetskog sistema, što podrazumijeva stvaranje zajedničke prenosne kompanije i regulatorne agencije na nivou BIH.
- Finansijska konsolidacija rudnika uglja, stavljanje carinskih dadžbina i obračuna poreskih obaveza pod jaču kontrolu osiguravajućih društava, penzionih fondova, investicionih društava i fondova.
- Podsticanje tržišne ekonomije, bankarskog razvoja sistema, subvencija, kamatnih stopa za stanogradnju i brže zapošljavanje mladih.
- Uspostavljanje registra računa i efikasnog osiguravanja naplate javnih prihoda, osiguravanje isplate stare devizne štednje, posebno kategorijama penzionera i za stambenu izgradnju radnika.
- Uvođenje PDV kao sistema obračuna poreza na potrošnju i dohodak, te prilagođavanje obračuna poreza na dobit u funkciji reinvestiranja i zapošljavanja.
- Razvoj i stimuliranje poljoprivrednih djelatnosti i prehrambene industrije, formiranje fonda za stalnu pomoć razvoju poljoprivrede, zaštita i obnova šuma, vodotoka i drugih poljoprivrednih bogatstava, i afirmacija proizvodnje zdrave hrane.
- Pokretanje javnih radova na svim nivoima, izgradnja putnih komunikacija, podrška ekološkim projektima, finansiranje javnih radova, izgradnja autoputa, modernizacija cestovnog i željezničkog saobraćaja, razvijanje turističke privrede (zimskog, planinskog, seoskog i pomorskog turizma).
- Stranka će se zalagati za što brže usvajanje zakonske regulative o pravima boraca, što podrazumijeva i rješavanje stambene problematike ove populacije, obavezno zapošljavanje ovih kategorija i stipendiranje djece šehida i palih boraca i ratnih vojnih invalida.
- Uspostavljanje nezavisnog sudstva.
- Reformisanje fiskalne politike.
- Organizovanje efikasne, stručne i ekonomične državne uprave.
- Usklađivanje radnog zakonodavstva sa uslovima tržišnog poslovanja;
- Bolje provođenje velike privatizacije.
- Organizovanje tržišta vrijednosnih papira.
- Podržavanje razvoja investicionih fondova.

- Donošenje zakona o restituciji.
- Otklanjanje prepreka privatizaciji i revizija privatizacije gdje se to pokaže potrebnim i opravdanim.
- Privatizacija banaka i aktiviranje agencija za osiguranje štednih uloga.
- Utvrđivanje odgovarajućih standarda za osnivanje banaka i uvođenje supervizije banaka.
- Stranka će se boriti protiv organiziranog kriminala, mita, korupcije i terorizma. Počinioci ovih krivičnih djela trebaju biti pravično procesuirani i niko ne treba biti pošteđen, niti na bilo koji način zaštićen.
- Pokretanje sveobuhvatne političke, ekonomske i druge aktivnosti za što brži prijem Bosne i Hercegovine u evropske integracije, Vijeće Evrope i Evropsku uniju, kao i Partnerstvo za mir i NATO Pakt, te uspostavljanje diplomatskih odnosa i razvijanje saradnje na principima poštovanja suvereniteta i teritorijalnog integriteta BiH.
- Povećanje poreskog obuhvatanja, smanjenje sive ekonomije i rada na crno, što će rezultirati boljim punjenjem penzionog fonda i budžeta.
- Eliminisanje međuentitetskih prepreka jedinstvenom tržištu u Bosni i Hercegovini, izgrađivanje infrastrukture sa visim nivoom uslužnosti i formiranje funkcionalnih javnih korporacija na nivou Bosne i Hercegovine.
- Obezbjedeње povoljnih uslova za ubrzanu i jeftiniju stanogradnju.
- Stvaranje mogućnosti za povratak i zapošljavanje mladih stručnih kadrova.

#### **IV SOCIJALNA POLITIKA**

Stranka penzionera-umirovljenika BiH zalagat će se za:

- Brže zapošljavanje radnika, a naročito mladih, što uključuje:
  - izradu osnove funkcionisanja tržišta rada, reorganizaciju službi zapošljavanja, otvaranje velikog broja malih i srednjih preduzeća; podsticaj zapošljavanja usmjeriti prema ciljnim grupama, koje će ostati bez posla u procesu privatizacije, razvijati posebne programe dokvalifikacije i prekvalifikacije radnika, adekvatnu odštetu za nezaposlenost, otvaranje javnih radova i donošenje novih programa zapošljavanja u poljoprivredi; obezbjeđenje povoljnih kredita za razvoj poljoprivrede i stimulisanje zapošljavanja kroz povlastice u poreznoj politici.
- Potpunije ostvarivanje opredjeljenja socijalne pravde, socijalne sigurnosti, jednakosti i solidarnosti u skladu sa materijalnim mogućnostima, što uključuje:
  - reformu i rekonstrukciju zdravstvene zaštite; usklađivanje penzija sa kretanjima plaća; redovnu isplatu penzija i radikalnu reformu penzijskog sistema; isplatu svih dugova i zaostalih penzija; reformu obrazovnog sistema; reformu u kulturi i doziranje međunarodnih standarda u obrazovanju i kulturi.

## **a) PENZIJSKO-INVALIDSKI SISTEM**

Ozbiljni problemi koji podrazumijevaju ekonomsko funkcionisanje sistema penzijsko-invalidskog osiguranja zahtijevaju hitno provođenje reformi koje bi osigurale bolju zaštitu materijalnog i životnog standarda penzionera, koji su radni vijek proveli izgrađujući društvo i boreći se za svoju porodicu, a danas žive na ivici bijede. Stoga će se Stranka zalagati za takav sistem koji će sadašnjim penzionerima osigurati redovitu isplatu zarađenih penzija u skladu sa rastom plaća zaposlenih radnika, a svim budućim penzionerima dostojanstvenu tzv. treću životnu dob i ekonomski sigurniju starost. Stranka će se zalagati: za uspostavu jedinstvenog penzionog sistema u Bosni i Hercegovini, sa identičnim nivoom prava za sve osiguranike, bez obzira gdje odluče da žive, za osiguranje dodatnih stalnih budžetskih izvora finansiranja, kako bi država bila garant za redovno isplaćivanje i najmanje dva puta u godini usklađivanje penzija sa rastom plaća zaposlenih radnika i za omogućavanje stvaranja dodatnih penzionih fondova (kao što je životno osiguranje i doživotna renta). Stranka će se posebno zalagati za povećanu brigu o starijim, iznemoglim i bolesnim penzionerima o kojima se sada brinu isključivo njihovi srodnici, zatim za povećanu brigu i zaštitu djece i žena.

Stečeno pravo na penziju je i neotuđivo pravo i ne može ga niko umanjivati i mijenjati.

I pored svih nastojanja u proteklom periodu, penzioneri nisu uspjeli ostvariti ni realno mogući obim zakonskih, neotuđivih prava. Ta činjenica dovela je do opredjeljenja da se pristupi iznalaženju novih formi djelovanja penzionera, prvenstveno kroz rad vijećnika i poslanika u parlamentima svih nivoa. Steklo se puno uvjerenje da je političko organizovanje adekvatan oblik potpunijeg djelovanja i uticaja penzionera na poboljšanje njihovog statusa. Zato je jedan od osnovnih ciljeva SP-U BiH zalaganje za humano zakonodavstvo u oblasti penzijsko-invalidskog osiguranja, za stvaranje uslova za bolji život penzionera i invalida i za stalno poboljšanje njihovog materijalnog položaja.

## **b) ZDRAVSTVENA ZAŠTITA**

Zalagat ćemo se da zdravstvena zaštita bude društvena kategorija, što podrazumijeva reformirano, moderno i efikasnije zdravstvo, a pod tim pojmom podrazumijevamo pravo pacijenta na slobodan izbor ljekara i ustanove. Borit ćemo se za formiranje fondova zdravstvenog osiguranja na nivou BiH. Zalagat ćemo se za potpunu besplatnu zdravstvenu zaštitu svih penzionera, nezaposlenih radnika i socijalno ugroženih kategorija radnika.

## **V DJELOVANJE ORGANA STRANKE**

U aktivnostima SP-U BiH i djelovanju njenih organa moraju biti zastupljeni principi dogovaranja, saradnje, konsultacija i drugih oblika komuniciranja sa parlamentarnim strankama, kao i udruženjima i njihovim asocijacijama koji u programu svoga rada imaju iste ili približno iste ciljeve i zadatke.

Saradnja SP-U BiH ne podrazumijeva njeno priklanjanje, iz formalnih razloga, bilo poziciji ili opoziciji, već ravnopravnu i konstruktivnu saradnju sa onim partnerima koji su spremni saradivati na istom planu, a posebno u ostvarivanju interesa penzionera i ciljeva i zadataka iz ovog programa.

Osnovni ciljevi za koje će se Stranka aktivno i uporno zalagati su:

- skladan, racionalan i adekvatan razvoj obrazovanja, nauke, kulture, sporta, informisanja, zdravstva, boračko-invalidske zaštite, socijalne zaštite i drugih društvenih djelatnosti i za efikasno funkcionisanje organa i službi u tim djelatnostima, radi zadovoljavanja potreba svih građana;
- izgradnja političkog i društvenog sistema zasnovanog na ravnopravnosti i jednakosti svih građana, na zaštiti manjina i za ostvarivanje jednakih prava i pod jednakim uslovima, za sve ljude bez obzira na nacionalnost, vjeroispovjest i političko opredjeljenje;
- razvoj lokalne i regionalne samouprave, zasnovane na historijskim, ekonomskim, geografskim i urbanim elementima i posebnostima - u skladu sa rješenjima koja se primjenjuju u savremenom razvijenom svijetu;
- donošenje humanih zakona i za njihovo pravilno sprovođenje, te zakonitost u radu i efikasnost u djelovanju izvršnih, upravnih i sudskih organa;
- zaštita i usklađivanje neotuđivih, a stečenih prava penzionera;
- politika koja se suprotstavlja podržavljenju ili privatizaciji penzionerskih domova, klubova, hotela, odmarališta, stanova, poslovnih i drugih objekata i imovine, protivno interesima i mimo uticaja penzionera;
- povrat i obeštećenje sve imovine koja je bila vlasništvo PIO-a u bilo kom vremenskom periodu, te njeno korištenje isključivo za potrebe penzionera i invalida;
- omasovljenje Stranke i organizovanje za njeno uspješno djelovanje na cijelom području BIH, kao jedinstvene političke organizacije penzionera BIH;
- obezbjeđenje maksimalno mogućeg biračkog tijela, uključujući penzionere, članove njihovih porodica, potencijalne penzionere, simpatizere i sve druge građane koji razumiju i cijene šta su penzioneri uradili u svom radnom vijeku za sadašnje i buduće generacije;
- što bolja i uspješnija predizborna kampanja i učešće sa svojim kandidatima na narednim općinskim i općim izborima;
- na izbore ići samostalno, a poslije izbora su moguće koalicije i stvaranje alijansi sa partnerima koji budu spremni podržati i obezbijediti realizaciju zakonskih prava penzionera i ostvarivanje drugih ciljeva iz ovog programa;
- donošenje Zakona o izmjenama i dopunama Zakona o PIO, Zakona o zdravstvenoj zaštiti, Zakona o potraživanjima u postupku privatizacije po osnovu razlika primanja korisnika prava iz PIO-a (certifikati) i Zakona o organizaciji PIO;
- usklađivanje penzija sa kretanjem prosječnih plaća, redovna isplata penzija i potpuna besplatna zdravstvena zaštita penzionera.

Stranka će se zalagati da se sredstva za gotovinsku isplatu duga penzionerima, kao i dugoročniju sanaciju PIO omogući preraspodjelom finansijskih sredstava koja će se obezbijediti iz privatizacije cjelokupne društvene imovine (stanovi, mala i velika privatizacija, sukcesija imovine bivše Jugoslavije i dr.).

U interesu ostvarivanja navedenih ciljeva i zadataka Stranka će inicirati aktivnu saradnju sa svim institucijama, organima, strankama, udruženjima i drugim asocijacijama

zainteresovanim i spremnim za takvu saradnju. Stranka će najšire saradivati sa svim političkim strankama u oba entiteta na planu izmjena Ustava BiH i Ustava entiteta u dijelu koji se odnosi na penzijsko-invalidski sistem, kako bi se i pravno uredilo da se taj sistem stavi u nadležnost organa BiH i omogući stvaranje jedinstvenog fonda PIO za sve penzionere na području BiH. Time treba da se penzije ujednače, kao i utvrde stalni izvori prihoda za PIO, te da se stvore pretpostavke za ujedinjenje udruženja građana penzionera i njihovih asocijacija u jedinstvene društvene organizacije, čime bi značajnije dolazila do izražaja jednakost, ravnopravnost i solidarnost svih penzionera-umirovljenika.

## **VI ORGANIZACIONI ZADACI**

Pored organizacionog ustrojstva na svim nivoima, od mjesnih organizacija do Glavnog odbora prema odredbama Statuta, posebna odgovornost je pred članovima općinskih i regionalnih odbora za dalje i što brojnije omasovljenje Stranke i njeno organizaciono jačanje, Konkretnije rečeno, nastaviti aktivnost u sredinama u kojima do sada nismo postigli zadovoljavajuće rezultate i uložiti veće napore na omasovljenju i organizovanju potrebnih organizacionih oblika Stranke.

Stranka će aktivno saradivati sa udruženjima penzionera i njihovim savezima i svoje djelovanje uskladiti sa njihovim djelovanjem u cilju ostvarivanja interesa i prava penzionera, te neće preuzimati ulogu udruženja penzionera, niti djelovati suprotno njihovim interesima. Po pitanjima od interesa za penzionere Stranka će najšire saradivati sa udruženjima i savezima penzionera i dogovarati način ostvarivanja tih pitanja. Stranka će inicirati i razvijati saradnju sa ostalim političkim subjektima, kao što su sindikati, boračke organizacije, udruženja žena i slično.

Stranka će se zalagati za nezavisnost, profesionalnost i nepristranost sredstava informisanja i za jednak i kvalitetan pristup svim informacijama i njihovo profesionalno i korektno objavljivanje. U okviru Stranke će se obezbijediti što dosljednije informisanje i saradnja sa svim medijima.

Ovaj program može, i treba, da posluži Glavnom odboru i ostalim organima u okviru Stranke, kao osnova i orijentacija u izradi njihovih programa i planova konkretne političke aktivnosti na organizovanju i ostvarivanju političkih ciljeva i programskih opredjeljenja utvrđenih ovim programom i programima izbornih aktivnosti.